

taille et leur demeura le champ auquel furent tuez Angloys et Lorroins en grand nombre, plusieurs blessés et navrez à mort, et y eut beaucoup de prisonniers et tout le demeurant fut mis en fuite. Ledit messire Guichard commanda que le corps de son frere fut leve et porte à saint Omer, ce qui fut faict incontinent, mais ce ne fut pas sans grand douleur et plainte de tous qui furent faictz sur le corps dudit mareschal. Aussi a la verite fut ung tres grand dommaige, car ledit mareschal n'estoit qu'en sa fleur et en laage de trente cinq ans. Il ny a langue qui sceult exprimer, ni plume qui sceult escrire la grande perte que ce fut tant pour son pays que pour le royaume de France.

Il deceda le troisieme jour may lan de notre Seigneur Jesus Christ mil trois cens cinquante ung. Son corps fut apporte dudit lieu de saint Omer a grand triumphe jusques en labbaye de Belleville ou il fut tres honorablement enterre au tombeau de ses predecesseurs. Lobsequie en fut faicte audit an mil trois cent cinquante ung, le dernier jour de juing, et fut mis au tombeau dernièrement faict pour son feu pere Guichard le Grand.

Madame Marye du Thil sa delaissee le survequit, et eut la tutelle et gouvernement de monseigneur Anthoine de Beaujeu et de madame Marguerite, ses filz et filles, et de toute la baronnye, terre et seigneurye de Beaujeu. Elle la gouverna et conduict si saigement, quelle acquerra le beau chasteau de Berzy, et si mourust au chasteau de Pailly dame de Beaujeu sa vye durant, l'an de notre Seigneur mil trois cens cinquante neuf, le quatrieme jour de mars.

Mondit seigneur Guichard, seigneur de Perreux, son frere, et oncle dudit Anthoine de par le pere seullement, espousa et eut a femme tres noble dame, madame Marguerite de Poictier, fille de hault et puyssant prince, monseigneur le comte de Vallentinoys, de laquelle il eust six enfans. Premie-